

國朝耆獻類徵初編卷百八十九目錄

疆臣四十一

方昂

汪志伊

成齡


鄂輝

許兆椿

李堯棟

台布

汪日章



國朝耆獻類徵初編卷百八十九

通奉大夫前署江西巡撫江西布政使司布政使湘陰李桓輯

疆臣四十一

方昂

劉文正公有言曰士大夫必有毅然任事之心而後可集事必無所牽就附合而後能毅然任事又必一塵不染一念不私而後能無所牽就附合至於仕宦升沈則有數焉君子弗論也余承師訓恆抱愧心乾隆庚辰分校會試得諸子桐嶼其性剛勁無所阿雖登鼎甲入翰林卒外調一郡坎壈以沒巧宦者恆指爲前車然桐嶼乾隆壬午典試山東得方子勘堂剛勁過於其師固未嘗不以

功名終蓋勘堂自辛卯成進士分刑部學習得貴州司主事癸卯
遷浙江司員外郎丙午遷雲南司郎中己酉出爲江西饒州府知
府庚戌遷江蘇蘇松道有尼之者遂以病乞歸壬子病痊仍往江
蘇候補甲寅署理松太道旋補江甯鹽巡道嘉慶戊午遷貴州按
察使己未遷江蘇布政使庚申閏四月以積勞成疾奏請解職遂
以是月卒其在刑曹也值新更秋讞之例凡金刃殺人之案槩定
爲情實勘堂分別其輕重固爭不得後果蒙 高宗純皇帝指示
改正緣是爲同事所服亦緣是爲同事所忌淹滯殆十年又嘗兩
上書與司寇爭司寇雖微愠而心重其人故卒排羣議而特薦之
其在饒州也值阮光平入 覲沿途守令多醵金飾供帳勘堂曰

聖天子以威德服四夷非誇以靡麗也戒所屬皆勿與頗忤上官既而密偵其居官實一介不取乃轉以此知坳堂諸事倚重焉其初擢蘇松道也饒州新守已任事坳堂具船將行矣適營弁緝鹽波及良善眾洶洶不平營弁遽以民變告且請徵兵坳堂曰新守與民未相習民弗信也乃自出曉諭捕首倡二十五人分別置法而申請上官褫營弁不動聲色大難立平其署松太道也閩廣洋盜竄入吳淞總督巡撫提督會師於寶山坳堂獨建議曰衢山與大小羊山江浙之分界也港汊叢雜盜船隨處可寄棹一得風潮之便倏忽出沒猝不及防當其乘風而來迎擊之則彼順而我逆及其趁潮而退追擊之則我後而彼先是使盜常憑勝勢也請

於要隘多設伏俟其至則縱使過而躡其後遇其退則扼不使前
以待後隊之追剿盜雖黠無能爲也眾從其議盜果大摧時督師
皆大吏勘堂一監司耳卽坐受指揮未爲緘默而籌畫方略慷慨
陳詞以一身任勝敗之責此其用心豈苟且自全者所知乎其爲
江甯鹽巡道也缺至清苦而繁劇特甚勘堂緝訟師剔衙蠹戢强
暴弭盜賊事事注以全力而尤以砥礪風俗爲先遇事則我用我
法若不知有宦途酬應事同官習聞其丰采亦不以爲訝也其爲
貴州按察使僅八閱月爲江甯布政使僅三閱月沈幾默察尙未
肯輕有作爲然其以病乞歸也 硃批奏摺有此人可惜之 旨
然則勘堂之生平 天鑒之矣使其沈痾早瘥開府建牙固掌握

中事卽天不假年未竟其用而以孤寒下士中朝無葭莩之親又負其磊落之氣動與物忤而數歷中外亦不爲不通顯然則剛柔者性也人所自爲者也窮通者命也天所預定而人無預焉者也觀於坳堂可知桐嶼之顛躓乃命之所爲卽使曲意脂韋不過自喪其所守安見策高足趨捷徑必一一紆青拖紫歟吾於是益信劉文正公之言不必以桐嶼之事遂猶豫不果矣坳堂諱昂字叔駒一字訥庵坳堂則其別號也先世歙人至 贈通奉大夫持干公始占籍山東歷城卽坳堂之考也娶楊太夫人又娶朱太夫人是爲坳堂之生母坳堂生於乾隆庚申五月十四日卒於嘉慶庚申閏四月二十八日年六十有一元配楊夫人繼配趙夫人並早

卒又繼配吳夫人子四世平世興世德世紱女三一適金鄉張鎮
峯一適吳江周霞一未受聘孫一某世平等將以某年月日卜葬
乞銘於余余素重坳堂之氣節乃不辭而爲之銘銘曰
佳城一閉泉路寂寥吾不知千百年後或鬱松柏或翳蓬蒿然銅
棺可朽鐵骨則不銷

右墓誌銘紀昀撰

公諱昂字叔駒其先由歙遷於義烏自公祖諱紹倫以上居義烏
二十三世至公考諱起英乃遷歷城祖考皆 贈江蘇布政使公
十三歲而孤貧甚爲歷城諸生親執薪汲以養母而其意怡然乾
隆壬午科舉山東鄉試辛卯恩科成進士授刑部主事居刑部十

餘年再擢至郎中其執法平用心仁恕屢以此與上官爭至忤而
公不變所守乾隆五十四年授饒州府知府饒州人甚愛之暮歲
命擢爲江蘇道交印將發矣而營弁以捕私鹽擾民於德興民
大驚恐皆欲奔亡公曰吾不可辭此責馳往民見公卽定公旋請
削武弁職而寘民之犯官鬪眾者於法然後至江蘇待缺以委審
積案三百餘勞甚致疾薨解病痊引 見復發江蘇署松太道事
值海上盜近寶山總督率兵至寶山防之公籌軍需甚備盜旋去
公乃建八策大府頗用之以弭後患次年補江甯鹽巡道公以爲
吏治不善與民俗之惡二者每相因而益甚故與諸生庶民語皆
諄諄教之如子弟知其貧乏者時濟以資至懲治姦蠹則極嚴峻

嘗早暮聽訟不懈民益趨公所而訟人或謂此非觀察之體也公曰然使舉吾職視不肖令長盡汰之吾坐受成豈不善然其勢不得非如此何以盡吾心哉自公臨江甯凡五年吏民風習之尤惡者大抵皆革而士皆親公矣旋擢貴州按察使行日民涕泣送之連塞數十里公亦爲泣顧而不忍去 今上夙聞公治名矣及臨大政卽擢公爲江蘇布政使公至江蘇甚欲有所建而巳被疾百日而卒嘉慶五年閏四月二十八日也年六十有一公爲人孝友仁厚雖家去義烏而修祠墓厚宗族皆盡其禮意作詩文不多而自然穎拔讀者知其爲奇人也夫人歷城楊氏生子世平女二婿張鎮峯周霞繼娶海陽趙氏生子世興世德又繼娶上元吳氏生

子世紱女一未字世平奉公葬歷城之某山桐城姚鼐居江甯時
親見民之戴公甚也爲之銘曰

卓犖其才勤撫眾黎用意愍慈 天子旣知作屏海淮任荷當時
宐壽以祺而早謝之家貧子羸舊民載思作是銘詩以告萬期
右墓誌銘姚鼐撰

汪志伊

汪志伊安徽桐城人乾隆三十六年舉人充四庫全書校對四十年議敘知縣籤掣山西四十九年補靈石縣五十一年遷霍州直隸州知州五十二年擢江蘇鎮江府知府五十三年調蘇州府知府五十六年二月授蘇松糧道十二月升江蘇按察使五十八年遷甘肅布政使六十年調浙江布政使嘉慶元年十月因蕭山縣額徵地租報解遲延督催不力以致杭州乍浦二處滿營養贍錢文三月未放經署將軍成明奏參上以汪志伊既未能先事催徵又未奏明籌款給發命解任交戶部侍郎台布赴浙審訊尋訊拘緩屬實並無別項情弊請交部嚴議部議降二級調用得

旨汪志伊降調事屬因公並聞其平日操守尙好著加恩補授江西按察使但伊此次獲咎較重卽補授臬司未免過優所有降調處分著改爲革職畱任帶於新任二年四月授福建布政使九月擢巡撫十二月漳泉盜首王騰等糾眾行劫客貲復拒捕殺傷弁兵志伊提訊後未卽正法仍具奏上以決不待時之犯輒復拘泥請旨致兇暴暫稽顯戮殊非整飭海疆之道嚴飭之三年五月奏水師人材難得請寬舊案疏防處分服制未滿人員與無服各員一體揀選先准升署副將參將請仍兼用本省人員遊擊都司守備於兩省通融撥補疏入報聞四年五月奏閩省州縣經收糧米限期過緊處分過嚴請仍以一年爲限升調各缺難得合例

人員請不拘三年俸滿及參罰十案以內之例人地實在相需仍得據實奏請通省攤扣軍需爲數過多恐有藉爲口實侵蝕倉庫之弊應請援免得旨軍需一項照原扣三成減二餘如所請十二月奏聞縣知縣王紹蘭守潔才優洵爲出眾循吏請量加鼓勵諭曰王紹蘭原係好員朕已早知其名見今在京大臣業已三四人在朕前密保者朕正欲降旨詢問該員官聲若何今汪志伊復將該縣居官實蹟破格保奏可見該撫於察吏尙能畱心王紹蘭卽著加恩送部引見另候擢用志伊因閩洋地面常有盜船游奕飭屬緝捕節次擒獲首夥盜犯多名及船隻礮械均先後奏聞會福鼎縣有匪徒倡立天地會經御史梁上國奏請查辦御史黃

國朝書牘彙編卷一百一十一
照復請嚴懲漳泉府屬會匪並械鬪惡習 敕下志伊嚴密訪查
五年四月疏報漳泉一帶匪徒節經剿捕均知斂跡 諭曰該處
會匪素以三指爲號更非持咒念經之邪教可比其滋事不法者
自應有犯必懲若並無犯事實跡遞行查拏徒滋紛擾轉恐激成
事端該撫惟當鎮靜妥辦固不可姑息養奸亦不可操之已蹙尋
奏稱漳泉所屬之龍溪詔安馬港海澄四廳縣地方經遴員力加
整頓以來見在民間均不械鬪 諭曰察吏爲安民之本欲使民
風不變必先吏治肅清龍溪等廳縣一經良有司認真整飭百姓
皆知改除積習是小民不難於化導要在親民之官得其人汪志
伊總當於平日遴擇賢員俾之實心任事爲正本清源之道五月